



ज्वजलपा वा:पौ

JWOJALAPA WEEKLY

दैं ७ ल्या: १० (पूर्णडक ११२) ने. सं. ११३६ यंलागा दशमि आइतवा: २०७३ असोज ९ गते आइतवा: (Sep- 25, 2016)

मू द १- पृष्ठ ६

नेवा: संस्कृतिया आधार दाफा संस्कृतियात च्वन्ह्याकेगु नितिं कार्तिक १२ गतेनिसें नेपालमण्डल दाफा महोत्सव



ज्वजलपा वा:पौ /

स्वनिग:या आदिवासी नेवा:तयगु म्हसीका पिब्वयाचंगु दाफा संस्कृतियात च्वन्ह्याका यंकेगु नितिं नेपालमण्डल दाफा महोत्सव वइगु कार्तिक १२ गते क्व:पुजाया दिनिसें याइगु जूगु दु। नेपालमण्डल टेलिभिजनया ग्वसालय अले ललितपुर महलया प्रायोजनय उगु कथंया महोत्सव यायेत्यगु ख:। शुक्रवा: नेपालमण्डल दाफा महोत्सव निर्देशन समितिया ग्वसालय स्वनिग:या गां गार्मनिसें थाय् थासय च्वंगु दाफा संस्कृति म्वाकाच्वपिं, थीथी कथंया जातीय संगठननिसें सरोकारवालातयगु त:जिगु मुंज्या जुल। उगु मुंज्याय निर्देशन समितिया छ्याञ्जे श्रीकृष्ण महर्जनं दाफा महोत्सव वइगु क्व:पुजाया दिननिसें स्वला तक शुक्रवा: व शनिवा: पतिकं सनिलय त:जिक ललितपुर मलय यायेगु जानकारी बियादीगु ख:। अथे हे निर्देशन समितिया न्वकू नापं ललितपुर मलया नाय: नेपाल डंगोलं करिव २० लख तक दां खर्च याना उगु कथंया त:जिक महोत्सव यायेगु वारे जानकारी बियादीगु ख:। निर्देशन समितिया दुज: प्राध्यपक सुवर्ण शाक्य, धर्म मुनिकार नापं थीथी व्यक्तित्वपिन्सं नेपालमण्डल दाफा महोत्सवया थीथी पक्षयात कया कनादीगु ख:। सहभागीपिन्सं थ:थ:गु जिज्ञासा तथादीगुयात ग्वसा: खलकं लिस: विइगु ज्या नं या:गु ख:। दाफा महोत्सवय त:जिक नेवा: अर्केष्ट्रा नं न्हयव्वयेगु नाप नापं दाफा महोत्सवयात छगू कथं दाफा संस्कृतिया संरक्षण सम्बर्द्धन यायेगु अले राज्यया ध्यान सालेगु नाप नापं दाफा संस्कृति म्वाकाच्वपिन्त ह:पा: विइगु कथंया छगू अभियान ख: धका: नं जानकारी बिउगु ख:।

ग्वसा: खलकं इना बिउगु नेपालमण्डल दाफा महोत्सवया विषययात कया च्वयात:गु पतिइ महोत्सवया बारे थुगु कथं न्हयथनात:गु दु। संस्कृतिइ विविधता दुपिं ऐतिहासिक नेपालमण्डल लागाया आदिवासी नेवा:त ख:सा नेवा: समाज दुनेया दक्ले अप्व: प्रभाव लाकाचंगु नापं नेवा:तयत संगठित यानाचंगु धइगु दाफा संस्कृति हे ख:। थनि निद्र: दैसिबें न्हय:निसें हे दुगु कथं नाललात:गु दाफा संस्कृति नेवा:तयगु म्हसीका जक मखु नेपा:या हे म्हसीका पिब्वया च्वंगु दु। दाफा खल: दुगु थासय दाफा खल:पाखें हे संस्कृतियात जीवन्तता विइगुनिसें नेवा:तयत एकता याना तयेगु ज्या जुयाचंगु खने दु। दाफा खल: दुगुलिं हे नेवा:तयगु छैंखाप्वा: पतिकं कलाकार दयाचंगु ख:। छगू कथं नेवा:तयगु सभ्यता

जुयाचंगु दाफा संस्कृति धइगु अमूर्त संस्कृति ख:। अमूर्त संस्कृतियात त्यका: तये मफत धा:सा छगू कथंया सभ्यता हे न्हना वनी।

२०७२ सालय ब्व:गु त:भुखाचं मूर्त सम्पदा जक मखु अमूर्त सम्पदाय नं त:धंगु लिच्व: लाकूगु दु। थीथी कथंया जात्राय जक मखु दाफा संस्कृतिइ नं त:धंगु लिच्व: लाकूगु दु। यक्व हे दाफा थाइगु फल्वा जीर्ण अवस्थाय दुसा दाफा संस्कृति नाप स्वापू दुगु बाजं नापं थीथी सामानत नं यक्व हे नष्ट जूगु दु। नेपालमण्डलया सभ्यताया रुपय धस्वानाचंगु महत्वपूर्णगु दाफा संस्कृति नं तसकं प्रभावित जूगु अवस्थाय दाफा संस्कृतियात जीवन्तता याना तयेगु, दाफा संस्कृतियात ई कथं ल्वयेक न्हयव्वया यंकेगु व हे कलाकार पिन्त थौया इलय मा:गु कथंया न्हयव्वयगु जुयाचंगु महु। दाफा संस्कृतिं जीवनय गगु कथं मनोरञ्जन बियाचंगु दु उगु कथंया मनोरञ्जन बिया नेवा: समाजय छगू कथं भुखाय ब्वया दु:ख जुयाचंगु अवस्थाय न्हयूल्वा: वयेके विइमा:गात नं ध्यानय तथा वनेमा:गु अवस्था दु।

विश्वय हे न्हयव्वये बह:गु दाफा संस्कृतियात च्वन्ह्याका नेवा: कलाकारतयत पिब्वयेगु, नेवा: संस्कृतिया महत्वयात थुइकेगु, दाफा संस्कृतियात न्ह्याकाच्वपिन्त तिव: विइगुनिसें नेवा:तयगु थ:गु हे कथंया संस्कृतिया रुपय धस्वाका न्हगु पुस्तायात नं दुथ्याका यंकेगु व मा:गु कथं प्रचार प्रसारया नितिं नेपालमण्डल दाफा महोत्सव यायेमा:गु ख:। थुगु सम्मेलन धइगु राष्ट्रिय स्तरया छगू कथं न्हयथनेबह:गु नमुना महोत्सव जुइ। नेपालमण्डलया आदिवासी नेवा:तयगु जीवन्त नापं अमूर्त संस्कृति दाफा संस्कृतिया च्वन्ह्याकेगु, त:भुखाचं प्रभावित जूगु लागाया दाफा संस्कृतियात पुनजागरण हयेगु, न्हगु पुस्तायात दाफा संस्कृतिइ दुथ्याका यंकेगु, दाफा संस्कृतिया महत्वयात थुइका: विश्वय न्हयव्वये बह:गु संस्कृतिया रुपय मा:गु कथंया प्रचारप्रसार यायेगुनिसें दाफा संस्कृतिया महत्वया बारे राज्यया ध्यानाकर्षण यायेगु नाप नापं दाफा संस्कृतियात म्वाकाच्वपिन्त हनेगु व इमित ह:पा: विइगु नितिं दाफा महोत्सव यायेगु आज्जु तथा थुगु महोत्सव यायेत्यनागु ख:।

दाफा महोत्सवय मूल रुपं दाफा हालेगु विधा अनिवार्य रुपं दुथ्यायेमा:गु नापं निगूगुगु विधा तसा विधाया रुपय बाजंया तालय प्याखं ल्हइगु, दाफा हाला: प्याखं ल्हइगुनिसें धिमे बाजाया तालय

प्याखं, धा: बाजाया तालय प्याखं, बासुरी बाजाया तालाय प्याखं नापं मेमेगु कथंया थीथी कथं प्याखं, ख्याल:, नाटक तक दुथ्याकेगु जुइ। दाफा महोत्सवय ब्वति काइगु प्रत्यक खल:पाखें थ्व निगू हे विधायात न्हयव्वयमा:। अथे हे ग्वसा: खल:पाखें दाफा महोत्सवय नेवा: बाजंया अर्केष्ट्रा न्हयव्वयेगु व्यवस्था याइ। विशेष याना उदघाटन समारोह व समापन समारोहसं विशेष प्रकारया अर्केष्ट्रा न्हयव्वयेगु ज्या याइ। अले आवश्यकता कथं दाफा महोत्सवया दथुइ दथुइ नं थीथी बाजंया अर्केष्ट्रा न्हयव्वयेगु ज्या याइ।

दाफा महोत्सवय ब्वति काइपिनिगु नितिं तयार या:गु नियम

१) प्रत्येक दाफा खलकं दाफा न्हयव्वयेगु भवलय म्होतिं नं च्याम्ह (८ म्ह)निसें भिन्त्याम्ह (१५ म्ह) तक दुथ्याकेफइ। २) खल:पाखें दाफा न्हयव्वइगु अनिवार्य रुपं खिं, ता, व बबुचा अर्थात भ्यालिंचा बाजं दुथ्याकेहे मा:। ३) पासा बाजं कथं थप बाजा स्वंगू दुथ्याकेफइ। अथे हे दाफाय प्याखं नं ल्हइफइ। प्याखं ल्हइम्ह नं कलाकारया रुपय हे ल्या:खायेगु ज्या जुइ। थप स्वंगू बाजया रुपय पासा बाजं कथं नगरा, द:, दबदब, कोचाखिं, प्वंगा, बय, तिनकुने, शंख लगायत दाफाय दुथ्याइगु बाजं दुथ्याकेफइ। ४) तालया सवालय दफाया पद्वति कथं हे जुइ। छ: ल्हायेगुनिसें दाफा हालेगु तकं बियात:गु ईया दुने क्वचायेकेमा:। ५) दाफा हालीगु भवलय फया फत्तले स्थानीयतायात वर्णन यानात:गु म्ये दुथ्याकेमा:। ६) दाफाय दुथ्या:गु म्ये पूर्वक हे ग्वसा: खल:यात न्हापा हे लिखित रुपं च्वया नापं दुथ्याइगु बाजया नां नं बिइमा:। ७) दाफा हालेगु वा थायेगु इलय कलाकारपिनिगु वस: नेवा: पह:या स्थानीयतायात प्राथमिकता बियात:गु जुइमा:। ८) दाफा थायेगु नितिं मा:गु कथंया बाजं थ:पिन्सं हे हयेमा:। ९) दाफा खल:या विवरण, कलाकारया नां, किपा:, दाफा खल:पाखें दैय दसं याना वयाचंगु सांस्कृतिक पर्वया गतिविधि, दाफा खल:या इतिहासयात नं फयां फक्व फारमय दुथ्याकेमा:। १०) दाफा बाहेक निगूगु चरणया ब्वज्या यायेगु नितिं दाफा न्हयव्वयेगु इलय थें हे दबुलिइ न्हयनीगु कथं भिन्त्याम्हसिबें म्हो जक कलाकारत दबुलिइ थनेगु यायेमा:। निगूगु चरणया ज्याभ्व: मुक्कं याना भिगू मिनेतया दुने क्वचायेकेगु कथं यायेमा:। छगू दाफा खलकं दाफा हालेगु व निगूगु चरणया ज्याभ्व: नापं याना दबुलिइ मुक्कं याना ४० मिनेटया दुने थ:पिनिगु प्रस्तूती क्वचायेकेमा:।



ज्ञाजलपा वा:पौ

सल्लाहकार
श्रीकृष्ण महर्जन
प्रकाशक:

नजरराम महर्जन
सम्पादक

श्रीकृष्ण तण्डुकार
ले-आउट:

ज्वजलपा डेस्कटप
संवाददाता

भरत महर्जन, निरजमान सिंह
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४१४०१०७७

ई-मेल : jwojalapaweekly@gmail.com

सम्पादकिय

संविधान संशोधनया खँ

थौकन्हय प्रमुख राजनीतिक दलया प्रमुख नेतातयसं सार्वजनिक रुपं बियादीगु अभिव्यक्तिइ संविधान संशोधनया खँ मदिकक न्हयथनेगु याना वयाच्वंगु दु । सत्तापक्ष माओवादी केन्द्रनिसँ कांग्रेसया नेतातयसं तकं आन्दोलनरत असन्तुष्ट पक्ष मधेसी जनजातिया माग कथं संविधान संशोधन यायेगु जुइ धका: न्वंवाना वयाच्वनादीगु दु । अथे हे प्रमुख प्रतिपक्ष दल एमाले धा:सा सुयागु चाहाना कथं जक संविधान संशोधन याये बिइगु जुइमखु धइगु आशय कथंया अभिव्यक्ति बिया वयाच्वंगु दु । तप्यंक हे संविधान संशोधनया पक्षय् एमाले मदु धका: तकं धायेगु याना वयाच्वंगु खने दु । अथे हे मेमेगु राजनीतिक पार्टीया नेतातयसं जक मखु मन्त्रीतयसं तकं संविधान संशोधनया खँयात कया न्वंवायेगु याना वयाच्वंगु दु ।

संविधान संशोधनपाखें थ:पनिगु माग पुरा यायेमा: धका: आन्दोलन याना वयाच्वंगु संघीय गठबन्धनलिसे प्रचण्ड सरकारं सहमति या:गु कथं संविधान संशोधनया खाका तयार यायेत निगुलिं पक्ष दुथ्यागु कार्यदल दयेकेगु ज्या तकं जुयाच्वंगु मदुनि । पिने पिने धा:सा संविधान संशोधनया खँय् सत्तापक्षयापिन्सं ब: बिया न्वंवानादीगु दु । थुगु ल्याखं स्वल धा:सा सरोकार वाला पक्ष अर्थात संविधानय् थ:पनिगु माग कथं संविधान संशोधन यायेमा: धका माग याना वयाच्वंगु संघीय गठबन्धनयात बेवास्ता याना सत्तापक्ष व प्रमुख प्रतिपक्ष दलया दथुइ सहमति याना संविधान संशोधन यायेगु कुत: या:गु जकं मखुला धका: न्हयस: ब्वलनाक:गु दु ।

लिपांगु इलय् सरकारया नेतृत्व याना वयाच्वंगु माओवादी केन्द्रया हे छम्ह नेता टोपबहादुर रायमाझी जिल्ला व आ:या ७ प्रदेशयात क्चा यायेगु कथंया प्रस्ताव हल धा:सा थ:पिं निर्णायक लडाई यायेगु धका: तकं घोषणा यानादीगु ख: । सत्तापक्षया हे नेतातयसं अथे धयादीगुयात स्वयेबलय् आ:या अवस्थाय् गनं संविधान संशोधनया खँ पिने वयाच्वंगु खँ तर दुनेया खँ मेता हे दुगु जकं मखुला धका: न्हयस: ब्वलनीगु स्वाभाविक हे ख: ।

बाखं दबूपाखें चीनिया साहित्यकारयात हन

नेपालभाषाया बाखं च्वमिपनिगु मंका: दबू कथं न्हयानाच्वंगु बाखं दबूपाखें चीनया नांजाम्ह: साहित्यकार छाओ चियानस्वीन्यात हंगु दु । वय्कलं च्वयादीगु थीथी विधाया च्वसू, बाखं व चिनाखंयात खय्भाषं भाय् हिला जब मन चराको गुडवाट उड्छ नांगु सफू वंगु वालय् जक पितव्वज्या जूगु ख: ।

बाखं दबूया ग्वसालय् शनिवा: जूगु ज्याभ्वलय् चनिया नांजाम्ह साहित्यकार छाओ चियानस्वनयात नेवा: संस्कृति कथं खेंसगं बिया हनापौ ल:ल्हा:गु ख: । वय्क:यात बाखं दबूया राजा शाक्य हनापौ ल्हानादीगु ख:सा ज्याभ्वलय विमला शाक्यं लसकुस न्वची बियादीगु ख: ।

बाखं दबूया दुज: प्राध्यापक नर्मदेश्वर प्रधानं लसकुस च्वचू बियादीगु उगु ज्याभ्वलय् नेवा: व चीनया बाखं साहित्ययात कया सहलह जूगु ख: । साहित्यकार मीना बज्राचार्य न्ह्याकादीगु उगु ज्याभ्वलय् दबूया संरक्षक लक्ष्मण राजवंशी नेपाल चीनया सहित्याया स्वापूयात कया विचवा: प्वंकादीगु ख: । ज्याभ्व: लिलक कायस्थया सभापतित्वय् जूगु ख: ।

सार्वजनिक पुखुत जोगय् यायेनु



नजरराम महर्जन

चकं थाय् भीत गुलितक मा: धका: वंगु दँया त:भुखाचं भीत क्यने धुंकल । आ: भीके चकं थाय् हे मदय् धुंकल । वरु धमाधम न्हना वनाच्वंगु दु । दुगुयात सुरक्षा यायेमफया च्वन दिंय् चाहइक पुखुत दयेकात:गु थौ व पुखुत नं ल्हाका यनाच्वंगु दु । न्हापा भी पुर्खापिन्सं वुई लखं थनेत, व वस्तु भाउ भवयेत ज्याछिंक थातुंथासय् पुखु दयेका: त:गु दु । अथेहे छुं गथेंजुया छेंयमिं न:सा ल:या समस्या मजुइक देसय् दुने नं त्वा:त्वालय पुखुत

न्हापाथें यक्व ल: मजाल । आ: नांजकया ल: मथागु पुखु जुयाविल । न्हापा व पुखुया ल: ह्वला वुई वापिइगु याइगु ।

अथे हे पाँगाया दथलय् नं छगू पुखु दु । गुगु पुखुली गुपुन्हिया सापारु बलय् साध्य:यात धरब्बाकीगु ख: । व पुखु थौतक दनि । तर न्हापायासिवें चीकू जुइधुंकल । पुखुया पूर्वपाखे नं आखा: छें दने धुंकल ।

न्हापा दथलय् हे खालय् नं छगू पुखु दुगु ख: । गुगु पुखुयात खा: पुखु धाई । न्हापा दुरुपुखुली ल: हया: व पुखुली तया: सफा याना:तिनि मेथाय् ल: छवइगु, वहे ल: त्वनेगु याइगु । लिपा दुरुपुखुया ल: पाईपय् तया: ह:सेलि व खा पुखुली न्या: लहीगु याना हल । असारं वापिइत ल: यंकेगु याना त:गु ख: । तर थौकन्हे व पुखु ल्हाना अन नं मंका: छेंय् दयेके धुंकल ।

वया क्वसं तलपुखु दु । उगु पुखूया लालपूर्जा नं दु । २१ सालया नापिकथं व पुखु बालकुमारी पंचायत २/क, कित्ता

वयां क्वय् नं छगू दन दु । गुगु दन बालकुमारी १/क, कित्ता नं.१९, ५.११ न्यापी व भिंछगू आना दु । गुगु दनय् न्हापा असारं व दनया ल: ह्वला: वापिइ । उकिं याना दँसिवुई इलय् वापी खना: वा नं यक्व स: । चिकुलां फुतबल म्हितेगु, सा, म्ये, फै भवइगु, मनूतय् आराम काइगु थाय् ख: । लिपा व पुखु चोभालय् च्वपिं सुं कार्कीपिन्सं थ:गु नामय् लालपुर्जा दयेका: हल धा:गु न्यना अन निगू स्वंगु दंतकला वा नं पिउगु सिउ, पुखुली वापिउपिन्त देसं थुंकल बिइगु याना ह:बलय् वापी मछाल । अले धुसिया सूर्यज्योति बलबया ल्याय्म्हतसं अन वापिके बिइमखु थ्व सार्वजनिक हे ख: धका: दावी यासेलिं अन वापिइगु बन्द जूगु ख: । व पुखुयात दँसिइ वुईपिन्सं भति भति याना अतिक्रमण याना: आ: प्यपी नं दइमखुत थें च्वं । थगुने भुखाय् ब्वया छेंयवुपिन्सं चा: वांछवयेगु याना: आ: नां जक पुखु दनि । पुखु



दयेका: त:गु दु । छुं नं गांया शोभा धइगु पुखु ख: । पुलांगु नेवा: वस्ती, नेवा: गामय् न्ह्याथाय् नं पुखुत यक्व दइ । ई हिलावेलिसं आधुनिकताय् पला: छयूपिं मनूतसं धमाधम पुखुत म्हासय् याना यंका: च्वंगु दु ।

न्हापा भी अग्रजपिनि सामाजिक मनूत जुयाच्वन । सामाजिक स्वार्थया निरति व्यक्तिगत स्वार्थयात त्व:ता बिइ । अथेजुयाला थातुंथासय् थ:गु धेवा खर्च याना भइ हिति, फल्वा दयेका: तइ । तर थौकन्हय् अथे मखय् धुंकल । मनूत सामाजिकसिकं व्यक्तिगत लाभ हानि स्वइपिं जुइ धुंकल । न्ह्याम्हेसियां छु याना सार्वजनिक सम्पति हडपय् यायेगु धइगु खँय् ध्यान वनेधुंकल । थन जिं पाँगाया दन(पुखु)या बारे खँ ल्हवनेत्यनारु दु ।

किपू नगरपालिकाया वडा नं.९,१०, ११ व १२ वडाय् ला:गु पाँगाय् नं यक्व हे पुखू दु । तर थौकन्हे अज:गु पुखु धमाधम म्हासय् जुया वनाच्वंगु दु । वा म्हासय् याना यंकाच्वंगु दु । पाँगाय् दुहाँवनेसातं ध्वाखासी पुखु धका: जिं सिइक हे दुगु ख: । न्हापा व पुखुली म्येलहीपिनि म्येयात म्हासिइकीगु पुखु ख: । ह्यें भवइगु पुखु कथं म्हासय् । असारं काचाक्क आकासं वा मवइबलय् व पुखुया ल: ह्वला वापिइगु जिं स्यू । आ: थौकन्हे व पुखु ल्हाना नवज्योति स्कूल व बिचा: गुथिया भवन दयेका धुंकल ।

पाँगाया लाछि नं देय् पुखु दु । व पुखु अफतकला दनि, तर ल: मथाय् धुंकल । न्हापाया पुखु बालाकेगु नामय् सिमेन्ट पुखुली व भूमि दयेकल । गनथाय् छु चुक जुल

नं.४१ पोखरी १ छपी व १० आना दु । व पुखुली पाँगामितय् सिइपनिगु श्राद्ध याना प्यं वायेयंकीगु थाय् ख: । थ:पनिगु पर म्परानाप स्वाना:च्वंगु पुखु जुया पाँगामितसं बालाक दयेका संरक्षण याना त:गु दु ।

पाँगाया धुसिइ भिना पुखु धाइगु पुखु दुगु ख: । गुगु पुखु बालकुमारी पंचायत ४/क, कित्ता नं.१६ पोखरी ७ आना ३ पैसा दुगु ख: । आ: उगु पुखु ल्हाना की.न.पा. वडा नं.११ या वडा भवन दयेके धुंकल ।

वयां क्वय् दन धा:गु पलस्वां पुखु दु । गुगु पुखू बालकुमारी पंचायत वडा नं.१/क, कित्ता नं.६ २.११ आना दु । गुगु थासय् पाँगामितय् भाजंगलय् सिथं यंका: लिहाँ वइबलय् मिर्जापिं फुकीवाकाय् नं अन म्व:ल्ह्या जक छेंय् वइगु चलन दु । थौतक नं व चलन द हे दनि । अले पाँगाया बादेयसिया फिन्ह्या दू व्यंक: वइगु थाय् नं अन हे ख: । न्हापा अन यक्व पलेस्वां स: । गुन्हुपुन्हिबलय् सापारु खुन्हु वस: घाका: छवइपिन्त पलेस्वां छुका: छवयेत वहे पुखुलीच्वंगु पलेस्वां खाना यंकीगु । असारं वापीबलय् व वालइबलय् ज्यायाईपिनि बजि नकीबलय् वहे दनय् लपिन्त खाना: यंका: बजि नइगु जिं यक्व सिउ । छुं दँ न्हय: व दन नं पाँगाया हे छखल:सं थ:गु धका: नाला: पुखुसिथय् छेंयतकं दने धुंकूगु ख: । तर लिपा पाँगाया ल्याय्म्हतसं अदालतय् मुद्दा तया: मुद्दां त्याका: व छें थुना: सार्वजनिक सम्पति यायेत ता:लात । आ: व थासय् प्यधा: हिति दु । उकिं चारधारा धाइगु जुइ धुंकल । व थासय् नं आ: मंका: छेंय् (सामुदायिक भवन) दयेके धुंकल । छकूचा जक पुखुया रुपय् ल्यंदनि ।

जायेधुंकल । अथे हे क्वय् दन धका: हान मेगु दन दु । गुगु दन नं बालकुमारी १/क कित्ता नं.१०७ पोखरी ७ रोपनी २ आना दु । न्हापा थ्व दन नं असारं वापीत ल: मुंकीगु, चिकुलां वस्तुभाउ भवयेगु व फुटबल म्हितीगु थाय् ख: । अन कसू नं यक्व दु । उकिं मस्त खोपचा छगू ज्वना: अन कसू माला न:वइगु थाय् ख: । थ्व पुखु नं चोभा:या हे सुं कार्की धा:म्हसं थ:गु नामय् लालपूर्जा दयेका: हयेधुंकल । तर अफतक व दनय् इमिसं थ:गु अधिकार जमय् यायेफुगु मदुनि । थ्व नं सूर्यज्योतिं क्लवं सुयातं थीकूगु मदु । अन गा:वंका: न्यां लहिना त:गु दु । व पुखुया संरक्षण यायेया निरति सूर्य ज्योति क्लवं पुखुया सिथय् सिथय् सिमा पिना:त:गु दु । थौकन्हे व सिमा तत:मां जुइधुंकुगु दु ।

च्वय् न्हयथनारु पुखुया लालपुर्जा व नापी शाखा कलंकीया भवतं थ्व न्यागु पुखू नं सार्वजनिक हे ख: धइगु प्रमाणित जूगु दु । तर दथु दन व क्वय् दन याना: निगू कित्ताय १२ रोपनी १३ आना जग्गा चोभा:या सुरेन्द्र जंग कार्की व राजेन्द्र जंग कार्कीया नामय् लालपुर्जा दयेके धुंकल धइगु खँ न्यनेदु ।

थ्व खँ ख:ला मखुला ? वुभय् याना: सार्वजनिक जग्गा गथेजुया व्यक्तिया नामय् लालपुर्जा दयेकल । थ्व खँ सिइका: मा:गु कथं पला: ल्हवने माल । थ्वखँय् सहलह व्याकेत पाँगाय सार्वजनिक अन्तर्क्रिया याना: वृहत नागरिक सरोकार केन्द्र दयेका न्ह्या:वनेमा:गु खनेदु । मखुसा करोडौं रुपैया वंगु सार्वजनिक सम्पति व्यक्तिगत जुइगु खतरा दु । आ:ला छुं नं यायेफइमखु, कन्हे इमिसं वहे लालपुर्जा व:कया कब्जा यात धा:सा छु यायेगु ? थ्व खँय् सकसिनं बिचा: यायेमा:गु हथाय् जुइधुंकल ।

हलिं नेवा: गुथिया चिनाखँ गोष्ठी



ज्वजलपा वा:पौ /

हलिं नेवा: गुथि ग:छें कचाया ग्वसालय् म्हग: शनिवा: किपूया मंगल उच्च मा.वि.या हलय् नेपालभाषाया चिनाखँ गोष्ठी जुल। हलिं नेवा: गुथिया मू नाय: शान्तप्रकाश श्रेष्ठजुया मूपाहाँसुइ, हलिं नेवा: गुथि ग:छें कचाया नाय: नारायण महर्जनया सभानायोसुइ जूगु ख:।

हलिं नेवा: गुथि यें कचाया सकुन्तला महर्जन व ग:छें कचाया सविना महर्जनपिन्सं न्ह्याकादीगु उगु ज्याभवलय् हलिं नेवा: गुथिया भाषा व लिपि कव: कजि बुद्धिलाल ज्यापु व समीक्षक रजनि मिला पाहाँकथं भायादीगु ख:।

डा.तुयूवहादुर महर्जनं किपू लागाया नेपालभाषा साहित्य गतिविधिया इतिहास कनादिसें

हलिं नेवा: गुथि व ग:छें कचाया म्हसिका न्ह्यव्वयादिल। अले थुगु ज्याभवलय् व्वति कयादीपिं कवि पिनिन स्वव्वय् थला न्ह्य:व्वया दिल। न्हापांनिसें मदिकक नेपाल भाषा साहित्य च्या वयाच्विपिं, न्हापा च्या दथुइ दिना: हानं आ: च्वयेगु सुरु या:पिं व न्हूचमिपिन्सं व्वति का:गु कना:दिल।

मिसापिं १० भिम्ह व मिजपिं ४६ पीखुम्ह यानां मुक्कं ५६ न्येखुम्हसं व्वतिका:गु उगु गोष्ठी न्याघौतक न्ह्या:गु ख:। ज्याभव:या दथुइ दथुइ थीथी म्यहालापिन्सं म्ये नं हाला: दीगु ख:। उगु गोष्ठी किपू, पांगा, नगां थक्वा: किपुल्वा, खप, सँक्व: सिंद, येंयापिन्सं नापं व्वतिका:गु ख:। समिक्षक रजनि मिलां अन व्वंगु चिनाखँया समीक्षा यायेगु भवलय् तसकं उत्कृष्ट

चिनाखँ नं दु छुं सुधार यायेमा:गु नं खनेदु। अथे हे हाइकू व गजल नं दुथ्यागुलिं च्वछाये वह:जु धयादिल।

मूपाहाँ शान्त प्रकाश श्रेष्ठजु नेपालभाषायात सरकारी तवरं छुं हे ग्वाहालि मदुसां भीभीपिं मिलय् जुया भीगु भाषा साहित्य च्वन्त्याकेगु तातुना: हलिं नेवा: गुथि निस्वनागु खँ कनादिल। भीगु भाषा भीगु तजिलजि भीगु म्हसिइका ख:। थुकिया विकास याना यंकेगु कुत: ख: धयादिल। सभा नाय: नारायण महर्जनं थ:गु व्यस्तताया बावजुद प्यघौं न्याघौतक च्वना ज्याभव: पूर्वका दीगुलिं सकसित सुभाय वियादिल। थये सकसियां ग्वाहालि दत धा:सा हानं हानं थुज:गु ज्या याना वनेत हौसला दइगु खँ कना:दिल।

सतक विस्तार विरुद्ध सोमवा: कालिमाटीनिसें थक्वा: तक मोटराइकल जुलुस पिकाइगु



ज्वजलपा वा:पौ /

सोमवा: ९ गते उपत्यका सतक पीडित संघर्ष समितिं येंयनिसें थक्वा: तक मोटरसाइकल जुलुस पिकाइगु जूगु दु। सोमवा: सुथय् ८ बजे नेवा:तयगु थीथी लागां मोरसाइकल सहित जुलुस याना कालिमाटीया चित्तधरया भ्वाता दुगु थासय् मुना मंका: कथं कालिमाटीनिसें थक्वा: तक अले हाकनं कालिमाटीइ हे वया क्वचायेकेगु जुइ धा:गु दु। थ्व हे भ्बलय् शनिवा: उपत्यका सतक पीडित संघर्ष समितिया ग्वसालय् नेवा: वस्ती बलम्बुनिसें थक्वा: तक विरोध जुलुस पिका:गु दु। कालिमाटीनिसें कलंकी जुया नैकाप, सतुंग: थानकोट तकया लागाय् सतक विस्तारया नामय् थपिन्त विस्तापिथ यायेत्यन धका: स्थानीयवासीतय्सं आन्दोलन याना वयाच्वंगु ख:। व हे आन्दोलनया भ्बलय् शनिवा: बलम्बुया गुर्जुधारांनिसें करिव ४ किलो मिटर तक जुलुस याना प्रदर्शन। जुलुसय् सहभागी जुयादीपिं स्थानीय मनूतय्सं हाकूगु ध्वाँय हाकूगु ब्यानर ज्वना सहभागी जूगु ख:। आन्दोलनकारीतय्सं अन्तरिम आदेश पालना यायेमा:गु, थपिनिगु जग्गा कायेत मुआब्जा बिइमा:गु, नेपा:मि जनताया सुरक्षा यायेमा:गु लगायत नारा थ्वयेका प्रदर्शन या:गु ख:। सुथय् या:गु उगु प्रदर्शनय् थ्यंमथ्यं ढ्ढिम्हसिवें अप्व: स्थानीय मनूत सहभागी जूगु ख:। उकिं याना उगु लागायत ट्राफिक तर्कं जाम जूगु ख:। थक्वातय् कोणसभा याना क्वचायेकूगु ख:।

किपुलिइ जूगु सुरक्षा सचेतना सप्ताह त:जिक क्वचाल

ज्वजलपा वा:पौ /

बंगु असोज १ गतेनिसें किपुली न्ह्यानाच्वंगु सुरक्षा सचेतना सप्ताह बंगु असोज ७ गते क्वचाल। उगु सप्ताहया लिपांगु दिं सुक्रवार विद्यालयस्तरीय म्याराथन दौड जुल। सुथय् ७ ता: इलय् पांगा चोक नयाँबजारं सुरु जुया: किपूया रिंगरोड चाहिला पांगा चोकय वया क्व:चा:गु ख:।

मिजपिं व मिसापिं विद्यार्थी याना निगु व्व:थला न्ह्या:गु उगु म्याराथन दौडय् छात्रपाखें न्हाप, ल्यू व ल्यूयां ल्यू एपीएफ स्कूल त्याकेत ता:लात। गुम्हेमध्ये आशवासन मिश्रां ९.२२ मिनेटय् दुरी पुरा याना न्हापलात। एपिएफयाम्हे हे चन्द्रवहादुर राना ल्यू व सविन के.सि. ल्यूयां ल्यू जूगु ख:।

अथेहे छात्रा पाखे ल्याबरेटरी स्कूलया श्रृजना दांगिं १३ मिनेट दुरी पुरा याना न्हाप जुल। पुष्प सदनया दिक्षा श्रेष्ठ १३.३० मिनेट पुरा याना ल्यू ल्याबरेटरी स्कूलया प्रकृति राई नं १४.४ मिनेट नं दौड क्वचाय्का ल्यूयां ल्यू जुइत तालात।

नेपा:या भेटरान धावक वैकुण्ठ मानन्धर मेडल क्वखाय्कूगु ख:। अन किपूया धावक धर्म महर्जन नं दुगु ख:।

वयां लिपा न्हिनय बास्केटबल कोर्टय् समापन समारोह यात। सांसद राजेन्द्र कुमार के.सीया पाहाँसुइ व विशेष पाहाँ एसएसपि विक्रम सिंह थापा व किपू नगरपालिकाया कार्यकारी अधिकृत उद्धव प्रसाद रिजाल जुयादीगु ख:।

बाघभैरव भजन मण्डलया भजन न्ह्यागु उगु ज्याभवलय् किपूया थीथी स्कूलया विद्यार्थीपिन्सं सांस्कृतिक ज्याभव: नं न्ह्यव्व:गु ख:।

‘सुरक्षा सचेतना सप्ताह’ या भवलय् किपूया लायकुली मुनां अन सामुदायिक सेवा केन्द्रया ज्याकू उलेज्या याना न्ह्याकूगु उगु सचेतना ज्याभव: अन्तर्गत सचेतना ज्याली पिकायेगुनिसें विशेष समारोह यायेगु अले थीथी कथंया ज्याभव: तर्कं या:गु ख:। थुगुसी गुगु कथं सुरक्षा सचेतना सप्ताह ज्याभव: यात उकिं याना किपू नगरया जनतयात उलि तक सचेतना ब्वलनीगु ख: धका: मनूतय्सं चासो तयाह:गु दु। गुगु कथं स्थानीय प्रशासननिसें स्थानीय संघ संस्थातत तर्कं जाना मंका: कथं अभियानया रुपय् न्ह्याकुलिं थुगु ज्याभव:यात छगू कथं महत्वपूर्ण ज्याभव:या रुपय् नालाका:गु दु।

सुरक्षा सचेतना ज्याभवलय् स्कूलया विद्यार्थीतनिसें सांस्कृतिककमीत तर्कं सहभागी जूगुलिं जनताया व्यापक सहभागीता जूगु ज्याभव:या रुपय् नालाका:गु दु।



साहित्य चिनाखँ

जित जन्म बियात:पि मां बौ यात
जिगु सुथ न्हापां हे दन्दवत प्रणाम
वयां लिपातिनि प्रणाम यायेजिं
राम कृष्ण व सूर्य चन्द्र भगवान ॥

मां नं जित जन्म बिया
थ्व संसार स्वका तल
बौ नं सत्संगया अमृत त्वंका
धर्मया ज्ञान थुइका बिल
मां बौ ला जिगु लागि करुणामय समान
द्य:यात सिवाय न्हापालाक
यायेजिं मांभोयात प्रणाम ॥

थ:गु दु:खया वास्ता मयासे
मानं ब्वलंका तल
मचानिसें हेका म्हितका
बौनं नका त्वंका तल
मांभौ धैम्ह जिगु थ:गु प्राण समान
द्य:यात सिबे न्हापालाक याये जिं
मांभोयात प्रणाम ॥

मचानिसें मानं जित
भिंगु लैय् थना तल
त:धिक: जूलिसे बौ नं जित
अनुशासनया लं वयना बिल
मांभौ धैम्ह जिगु लागि गुरु गूरमा समान
द्य:यात सिबे न्हापा यायेजिं
मांभोयात निं प्रणाम ॥

कतकिया भ्वातिं जुया मानं जिगु
जीवन सफल याना बिल
बौया हिच:तिया कमाई नं जित
योग्य याना तुतिं चुइका तल
मां बौ धैम्ह जिगु लागि विश्व विद्याता सिबे महान
द्य:यात सिबे न्हापां याये जिं मांभोयात प्रणाम ॥
मांभोया न्ह्योने काय म्थ्याय भीपिं
न्ह्याबलें मचा हे समान

महिमा मां अबुया



नाति महर्जन
चोचपा, पाँगा

मांभोयागु वांलाक सेवा याना
काय मा: बुद्धि ज्ञान
वांला:गु बुद्धि ज्ञान बिया
मिखा कंकूपिन्त यायेमा सलाम
द्य:यात सिबे न्हापा
यायेमा भीस मांभोयात प्रणाम ॥

थ: मचातयेत कांसां खुसां
माया याना शिक्षा दिक्षा बिया तल
थौकन्हे वहे मचात मांभोया कृपां
सर्गतय नौ थें ज्वारा ज्वारा थिना बल
भीसं न्ह्याक्व या:सां कम हे जुई
मांभोया महिमा गुनगान
द्य:यात सिबे न्हापा यायेमा मांभोयात प्रणाम ॥
थ्व संसारे द्य: धैम्ह मांभोजक निम्ह
थ:मन:सें मचाखाचातेत हुकें यानाच्वन
मांभोये त:धोपिं मखुथें च्वं रामकृष्ण द्य:
भीसं मांभोया तुतिया धुलं सिन्हतिना
यायेमा: सेवा सम्मान
मानव समाजया सृष्टि कर्ता
मांभौ संसारे हे महान
द्य:यात सिबे न्हापा यायेमा
भीसं मांभोयात प्रणाम ॥

मोहनी नख:या लसताय् विज्ञापन भित्तुना बिइत लुमंकादिसँ

नेपा:मिपिनिगु हे मंका:गु नख: दशैं नापं
नेवा:तय्गु विशेष कथंया नख: मोहनीया
लसताय् विज्ञापन बिया थ:गु ब्यापार
ब्यवसाय च:कंकादिसँ

मोहनी नख:या लसताय् भित्तुना नं बियादीफइ ।
नापं
मोहनी नख:या बारे च्वसू दुसा च्वयादीत नं
इनाप यानाच्वना । अले ज्वजलपा वा:पतिइ
पिकायेगु जुइ ।



ज्वजलपा वा:पौ

ज्याकू: निखासी त्वा: किपू नपा-३
फोन ल्या: ४३३३००७, ९८४९४०९०७७
ई-मेल : jwojalapaweekly@gmail.com

गन च्वन अन संगठन

गुथि दयेका थ:पिनिगु म्हसीका
पिब्वइगु कथंया संस्कृति
न्ह्यब्वये याना वयाच्वपिं नेवा:त
ख: । स्वनिग:या आदिवासी जुया
नं स्वनिगलं पिने गन गन
च्वंवनाच्वन अन अन च्वना
संस्कृति हना वयाच्वंगु ला
अप्व:सिनं सिउगु हे खँ ख: ।
स्वनिगलं लिपने जक मखु
देशं पिने वना च्वपिं नेवा:त तकं
गथि दयेका अन नं नेवा:
संस्कृति हना वयाच्वंगु दु । अथे

न्हय्गू समुद्रा तापक्क वनाच्वपिं
नेवा:तय्सं नं साया: नख: हनेगु
ज्या लिपांगु इलय् सुरु जूगु दु ।
संस्कृतिया ल्याखं विविधता
दुपिं नेवा:त ख:सा नेवा:तय्गु
मंका:गु संस्कृति मध्ये साया: छगू
नं ख: । नेवा:य्गु मृत्यु नाप स्वापू
दुगु मौलिक संस्कृति कथं
नालात:गु साया: धइगु दैय् दसं

गुंलागा पारु खुन्हु पिकाइगु
ख: ।
नेपा: पासा पुच: अमेरि
काय्वा खसालय् थुगुसी अमेरि
काय् नं साया: पिकायेगु ज्या
जुल । अनया मेरित्याण्डय् थुगुसी
न्हापांखुसी सापारु कुन्हु साया:
पिकायेगु ज्या जूगु ख: । थ्व
अमेरिकाय् पिहां व:गु न्हापांगु

साया: ख: । गुंपुन्हिया नेवा:
मुना याये थें जूगु उगु ज्याभवलय्
अमेरिकाया निंतिं नेपा:या र
जदूत डा. अर्जुनकुमार कार्की,
कन्सुलर जनरल प्रेमराजा महत,
डीसीएम जीवन श्रेष्ठ, आर्थिक
कन्सुलर कैलाश पोखरेल आदिपिं
नं भ्ना:गु ख: । ज्याभवलय्
सापारुया बारे पासा पुच: अमेरि

काय्वा नाय: सरोज प्रजापतिं
कनादीगु ख: ।
औपचारिक ज्याभव:
लिपा साया: पिकायेगु ज्या जूगु
ख: । नेवा: बाजं थाना: अनया
ट्वीटन रिजनल पार्क लागाय्
उगु साया: चा:हिउगु ख: । थुकी
मदुपिं भाजु आशाकाजी श्रेष्ठ,
मय्जु सावित्रीदेवी जोशी व

मय्जु कृष्णदेवी वैद्यया छेंज:पिसं
वय्क:पिनि किपा समेत तया:
साया: पिका:गु ख: । थुकी
वय्क:या थ:थितिपिं हे साया: व:गु
ख: ।

अमेरिकाय् न्हापांखुसी
पिहां व:गु थ्व साया:या लागिं
मा:गु थोथी ज्वलं नेपालं भिके
यायेगु ज्या जूगु ख: । साया:
पिकया: चा:हिलेधुंका: अन नेवा:
भव्य नकेगु ज्या जूगु ख: । उगु
ज्याभवलय् करिव न्यास:म्ह मनू
सहभागी जूगु ख: ।

अमेरिकाय न्हापांखुसी साया: पिकाल

**पिदंगु दु
स्वंगू सफू**

उपन्यास

थ्वया च्वंगु स:

न्वचू, उद्घोषण व एफ एम

संचालन कला नास:

चिनाखँ मुना ईब्य:या चिनाखँ



नजरराम महर्जनया
भिंछंगूगु उपन्यास
'थ्वयाच्वंगु स:'

मू
निस: तका जक



श्रीकृष्ण महर्जनया
न्यागूगु सफू
'नास:'

मू
न्यय् तका जक



नाति महर्जनया
न्हापांगु सफू
'ईब्य:या चिनाखँ'

मू
सच्छि तका जक

थ:गु प्रति
सुरक्षित
यानादिसँ
न्हि
स्वापू

४३३३००७,
९८४९४०९०७७

अन्धविश्वासय् लिकुनाच्चंगु विज्ञान



पन्नारतन महर्जन

ब्वरिसं हि त्वनीगु खँ



नेवा: समाजय् थीथी कथं संस्कृतित दु अले थ:थ:गु कथंया धारणा दयेका वयाच्चंगु खने दु । संस्कृतिइ विविधता दुपिं नेवा: समाज दुने थथे याये मत्य: अथे याये मत्य धका: थीथी कथंया अन्धविश्वास ल्यनाच्चंगु दु । अज्व:गु कथंया अन्धविश्वास दुने वास्तवय् विज्ञान सुलाच्चंगु दु धका: पन्नारतन महर्जनं क्यनादीगु दु । वयकलं नेवा: समाज नाप स्वाका अन्धविश्वासरय् लिकुनाच्चंगु विज्ञान नांगु सफू तकं च्वयादीगु ख: । व हे सफूपाखें निरन्तर रुपं न्हयब्वया वयाच्चनागु ख: - सं.



गबलें गबलें भीगु म्हय् ह्याउँक, वँचुक चात: चात: खने दये य: । अज्व: याना: नाइसे क्यातुगु ला दइथाय् खम्पा, लप्पा, पिलाकव आदि थासय् दइ । थथे जुइगु काचाकक

चाइमखु । थ्व स्याइ नं मखु, भचा चासुइ । तर म्ह भचा त्यानुला धयाथें जुया: न्हय: व:थें जुइय: । अक्सर याना: चासु वयेबलय् भीसं थज्या:गु थाय् खनी ।

म्हय् थथे चात: खन धायेवं ब्वरिसं हि त्वन धायेगु चलन दु । ब्वरिसयात मनंमनं बाय् मेपिसं मतायेक ब्व: बीगु याइ ।

थ: मय:म्ह सुं द:सा वयात हे ब्वरिस पा:याना: मनमुताव ब्वलंकेगु नं याइ । एकतीर्फ रुपं जूसां इस्यां याना: वयापाखे तापाना वनेगु स्वइ ।

म्हय् खने दयावइगु थज्या:गु चात: ब्वरिसं हि त्वनीगु धा:सा मखु । थ्व छगू अन्धविश्वास जक ख: । मचा मचावलय् थथे सुयातं जुइमखु । त्यासे ल्याय्म्हपिन्त नं अपवादया रुपय् छम्ह निम्हसित जक जुइ । अज्व: याना: त्यासे ल्याय्म्हसू फ:पुल धायेवं थथे जुइगु जुइ ।

भीगु म्हय् तत:पुगु हिनूया लिसे अल्याख चिचीपुगु हिनू नं दइ । क्यातुगु ला दुथाय् ला भन मिखां हे न्ह्याये

मदुगु असंख्य हिनू दइ । थ्व खँ स्वास्थ्य विज्ञानं प्रमाणित याये धुंकूगु दु । थज्या:गु हिनूली छुं भचा जक अवरोध बलकि हे तज्याय् फु ।

छपु निपु जक तज्यातले छुं संकेत खंके फइमखु । सामुहिक रुपं यक्व छक्वलं तज्यात धायेवं थ्वया लक्षण खने दयावइ ।

तज्या:गु हिनूया हि फुकं छकूचाय् जक छयालब्यालं जुयाच्चनी । थुकिं याना: व थाय् या लाय् ह्याउँक वँचुक खनेदयावइ । छकूचा थासय् यक्व हिनू तज्याइबलय् लाया सतह भचा थर्हाँवं क्वर्हाँवथें नं जुइ । गथे मती तल अथेहे खना वइगुलिं याना अज्या:गु थाय् वाकुवां थें तायावइ ।

ब्वरिसं हि त्वनीगु धयागु छगू ल्वय् ख: । थ्व ल्वचय् भचा भचा जक जुतले उसाँययात अपायच्चं असर याइ मखु ।

ह्याउँसे वँचुसे च्वंगु चात: नं निन्हु प्यन्हुं लिपा तनावनी ।

तज्या:गु हिनू नं थ:थम्हं तुं जाया वइ । थ्वया लागि शक्तिया आवश्यकता धा:सा जुइ । उकिं थज्या:गु इलय् भुकुभुकुं न्हय: वइ । न्हय: बल धका: मिचय् याना: जुइमज्यू ।

आराम याना: स्यंगु हिनू परिपूर्ति याके बी मा: ।

छक्व:पतिं बाय् यक्व अथे जुल धायेव बांलाक जाँचय् याना: बास: यायेमा: । यक्व जुइमा: नं चुच्चन धायेव थ्व ल्वय् प्राण घातक नं जुइ य: ।

भचाभचा जक जूगु इलय् थ्व ल्वय्या नियन्त्रणया निती अम्ब: वा भिटाभिन सी प्रचुर मात्राय् दइगु फल नयेगु यात धा:सां थ्व ल्वय् नियन्त्रित जू ।



मोहनीया इलय् जात्रा याइगु वस्ती ख्वना

श्रीकृष्ण महर्जन

मोहनी नख:या इलय् यल जिल्ला दुने ला:गु नेवा:तय्गु पुलांगु वस्ती ख्वनाय् जात्रा याइगु चलन दु । सिकाली माजु आर्थत सिकाली छ:या जात्रा याइगु ख: ख्वनय् । अथे मोहनी नख:या इलय् अन जात्रा याइगु जुया यक्वसिनं मोहनी नख: मदुगु वस्ती धइगु ख्वना ख: धका: धायेगु याना वयाच्चंगु दु ।

न्यंकं बाखं कथं यँया क्व:ने लागायापिं हे ख्वना: ख्वना खुसि सिथं सिथं वना च्वंगु अले अन हे वस्ती दयेका च्वंगु नेवा: वस्ती जूगुलिं हे ख्वना धा:गु धाइ । स्थानीय मनूतय्गु धापू कथं ख्वनाया आ:या वस्ती जुइ न्हय: न्हापा ख्वनां भच्चा तापाकक कुदेशय् वस्ती दुगु अले लिपा मल्ल कालय् वया जक आ:या ख्वना वस्तीया रुपय् विकास जूगु धाइ ।

१३ सताब्दीइ कुदेशय् वस्ती जूगु लिपा १५ औं सताब्दी वया जक आ:या ख्वनाया वस्ती जूगु ख: धाइ । स्थानीय मनूतय्सं ख्वनाया सिकाली प्याखं रत्न मल्लाया इलनिसें सुरु जूगु धाइसा वसिवें न्हय: हे अन भेलु



अर्थात भैल: छ:या जात्रा अर्थात भैरवया जात्रा दुगु ख: धाइ ।

यँया क्व:ने लागायापिनि भैल: छ:या जात्रा जुइगु इलय् हे ख्वनाय् नं जात्रा जुइगु जुया ख्वना व क्व:नेलागा नाप तसकं स्वापू दु धका: धाइ । लिपा वना मल्लकालय् जक ख्वा:पा: प्याखं दुगु ख: धाइगु मान्यता दु ।

मल्लकालय् हे व्यवस्थित वस्तीया रुपय् विकास जूगु ख्वनाय् मोहनी नख:या इलय् मूल रुपं भैल: छ:, अष्टमातृका गण नापं थीथी छ:या छ:ख: जात्रा नाप नापं ख्वा:पा: पुया प्याखं ल्हइगु तक याइगु ख: ।

ख्वनाय् प्याखं व जात्रा

ख्वनाय् दँय दसं कौलाथ्व पारु अर्थात न:लास्वनेगु पारु कुन्हु त:गुथि, सलां गुथिया प्यम्ह प्यम्ह कुमारतपाखें फुकक छँखाप्वा: पतिकं पुजा काइगु चलन दु । अले उगु पुजा बहनी जुइवं सिकाली ख्यलय् वना अनया सिकाली छ:याथाय् पूजा याइगु ख: । अथे हे दुतिया कुन्हु नं पुजा कया सिकाली ख्यलय् हे वना पुजा याइगु ख: ।

अले तृतिया कुन्हु नं पुजा फया न्हिच्छि हे अपसं च्वनी । तृतिया कुन्हु देशं पिने त:गुथि, सलां गुथि व ज: गुथि अर्थात जम्मू गुथिपाखें च्वख्ख: फल्वा न्हय:ने छम्ह छम्ह थुम्यय् बलि बिइमा:गु चलन दु । अथे स्वंगू गुथिपाखें

बली विउपिं स्वम्ह थुम्यय् मध्ये त:गुथि व सलां गुथिपाखें स्या:पिं म्यय्या हि च्याम्ह कुमारतय्सं पा: भुचाय् तया सिकाली ख्यलय् छ:याथाय् यंकेमा:गु चलन दु । अथे हे ज:गुथिया हि धा:सा अनं तुं सिकाली माजुया नामय् छ्वाका: छवइगु चलन दु ।

उगु कथं थुम्यय्या हि यंके धुंका: सिकाली ख्यलय् च्वम्ह सिकाली छ:याथाय् स्वंगू हे गुथियापिं च्वना विशेष कथंया पुजा याइ । उगु पुजायात गोप्य व तान्त्रिक पुजा नं धायेगु याना वयाच्चंगु दु । अनं लिपा थुम्यय्या ला जात्रा याना देशय् दुत हइगु नापं थ:थ:गु गुथिइ

विशेष पुजा याना दुकाइगु चलन दु । उखुन्हु हे चान्हय् व हे थुम्यय्या लाया छवयेला छुया नइगु जुया छवयेला भू नं धायेगु याना वयाच्चंगु दु । छँखाप्वा: पतिकं चौथि कुन्हु छवयेला भू मानेयाइ । अथे हे चौथि कुन्हु स्वंगू हे गुथिपाखें हाकनं छम्ह छम्ह म्यय् थ:थ:गु गुथिया न्हय:ने स्यायेगु याइ । अले बहनी व हे म्यय्या ला तया गुथियारतय् भव्य नइगु ख: । चौथि कुन्हु हे स्वंगू गुथिपाखें क्वंछ: अर्थात भैरव स्थापना यायेगु ज्या याइ ।

कथंहे.....



बिचा: हायेका

जन्म
२०११/१०/१५

मदुगु:
२०७३/५/२८



मदुम्ह दिल बहादुर महर्जन (हुकु)

धुम्बाजु समूहया संस्थापक सदस्य उमेश महर्जनया हनेबह:म्ह अबु व संगीता महर्जनया सस:अबु दिलवहादुर महर्जन (हुकु)या २०७३/०५/२८ गते बुधवा: आकाभाकां मदुगु थौं भिस्वन्हूया पुण्यतिथिसं मदुम्हेसिया सुखावती भुवनय् बास लायेमा धका: कामना यासैं दुखंक:पिं सकल छैज:पिन्सं मनचिइ फयेमा धका: बिचा: हायेका च्वना ।

धुम्बाजु समूह
कीर्तिपुर



मदुम्ह नेवा: न्ह्यलुवा: डंगोलया लुमनितइ श्रद्धाञ्जली सभा

नेवा: न्ह्यलुवा:नापं ज्यापु महागुथिया संरक्षक मदुम्ह इन्जिनिय मोहनकृष्ण डंगोलया लुमन्तिइ शनिवा: सुथय् श्रद्धाञ्जली सभा जुल ।

न्हूदैं समारोह समितिया पुलांम्ह नाय: तकं जुयादीम्ह वंगु असोज ३ गते मदुम्ह डंगोलया लुमन्तिइ श्रद्धाञ्जली सभा येँया

इतुंबहालय् या:गु ख: । ज्यापु महागुथि केन्द्रया ग्वसालय् जूगु उगु श्रद्धाञ्जली सभाय् थीथी संघ संस्थाया प्रतिनिधिपिन्सं श्रद्धाञ्जली प्वंकादीगु ख: ।

ज्यापु महागुथिया नया: राजभाई जक:मिया नाय:सुइ जूगु ज्याभुवल्य् थीथी व्यक्तित्वपिन्सं ममदुम्ह मोहनकृष्ण डंगोलया

व्यक्तित्व नाप नापं वय्कलं यानादीगु योगदानयात कया चर्चा यानादीगु ख: ।

मदुम्ह डंगोलं नेपालभाषाया उपन्यास व नाटक विद्या मध्ये पा:पा: याना निगू विधाया च्वमिपिन्त ह:पा: बिइगु नितिं प्रेम मोहन सिरपा: तकं पलिस्था यानादीगु ख: ।

नेपाल रेडक्रस सोसाइटीया हिदान

नेपाल रेडक्रस सोसाइटी किपू कचां म्हिग: सनिवा: नयाँबजारया कृष्ण क्याटरिंगया हलय् मोहन, स्वन्ति व नेपाल सम्वत ११३७ न्हूदैंया लसताय भिन्तुना कालबिल नापं हिदान ज्याभव: नं या:गु दु । वंगु असोज ८ गते सुथय् च्याता: इलय् निसैं गुता: ईतक भिन्तुना कालबिल ज्याभव: या:गु ख: । सुथय् भिता: इलनिसें स्वता: ई तक हिदान ज्याभव: या:गु ख: ।

बिचा: हायेका

जन्म: ने. सं.
१०४८ पोहेलागा
चौथी



निधन:
ने.सं. ११३६
यंलाथ्व दशमी



मदुम्ह दशवहादुर महर्जन

थुगु नगां दाफा खल:या म्यें गुरु दश बहादुर महर्जन २०७३ भाद्र २६ गते सं ८९ दँय् आकाभाकां मदुगुलिं दाफा खल: पाखें दु:ख प्वंकुसे मदुम्हेसिया सुखावती भूवनसं बास लायेफयेमा नापं दु:खंक:पिं सकल छैज:पिन्सं नुग: चीफयेमा धका: बिचा: हायेका च्वना ।

नगां दाफा खल: -९६६

नगां, कीर्तिपुर -१६

बिचा: हायेका

जन्म
२०११/१०/१५

मदुगु:
२०७३/५/२८



मदुम्ह दिल बहादुर महर्जन (हुकु)

तुँभो पुच:या सदस्य जिमि स्यान्त्या:म्ह पासा दिल कुमार महर्जन व किजा उमेश महर्जनया हनेबह:म्ह अबु दिलवहादुर महर्जन (हुकु)या २०७३/०५/२८ गते बुधवार आकाभाकां मदुगु थौं भिस्वन्हूया पुण्यतिथिसं मदुम्हेसिया सुखावती भुवनय् बास लायेमा धका: कामना यासैं दुखंक:पिं सकल छैज:पिन्सं मनचिइ फयेमा धका: बिचा: हायेका च्वना ।

- | | |
|------------------|------------------------------|
| १. अमिर श्रेष्ठ | ५. राजेन्द्र महर्जन 'कान्छा' |
| २. विनोद महर्जन | ६. सुरेन्द्र शाक्य |
| ३. प्रमोद महर्जन | ७. उमेश महर्जन |
| ४. राजन श्रेष्ठ | ८. भविन्द्र महर्जन |

तुँभो ग्रुप

तुँभो, की.न.पा.-४